

1983-01-26 – SS Ioannes Paulus II - Littera ‘Cultum et Venerationem’

IOANNES PAULUS PP. II

LITTERAE APOSTOLICAE

CULTUM ET VENERATIONEM

**SACRA AEDES B. MARIAE VIRGINIS A VISITATIONE IN VERTICE
«MARIANSKE HORA» SUPRA URBEM LEVOČAM, DIOECESIS SCEPUSIENSIS,
BASILICARUM MINOURUM NUMERO ACCENSETUR**

Ad perpetuam rei memoriam. – Cultum et venerationem beatæ Mariæ Virginis usque augeri, eius gloriam propagari, redde illi honorem cum dignitate parem: id profecto semper et sollemne Nobis et sanctum fuit, cum sit beatissima illa Virgo Christi Mater caelorumque Regina, atque filiorum suorum, quotquot hic in terrestri plaga degimus, Patrona fidissima custosque sollicita. Quare, cum dilectus Filius Stephanus Garai, auctoritate qua pollet uti Ordinarius ad interim dioecesis Scepusiensis, in Slovachia, datis Litteris die VII mensis Maii, anno superiore, a Nobis magna prece petierit sive suo, sive cleri atque Christifidelium nomine, ut sacra aedes beatæ Mariæ Virginis a Visitatione intra fines eius sita dioecesis, in vertice nempe «Marianska Hora» supra urbem Levočam, in ordinem Basilicarum Minorum referretur; Nos ratione habita tum sacrae illius aedis antiquitatis, tum singularis eius historiae, tum eius momenti ad fidem religionemque Slovachi populi alendam (quæ sane causa est omnium potior), libenti quidem animo admotæ expostulationi cedendum putamus. Placet ergo templum seu Sanctuarium Visitationis beatæ Mariæ Virginis, de quo sermonem instituimus, Levočæ surgens, in finibus dioecesis Scepusiensis, Basilicarum Minorum numero accenseri, cum iuribus et concessionibus liturgicis talium templorum propriis, servatis nempe quæ decretum «De titulo Basilicæ Minoris» iubet, die VI mensis Iunii factum, anno MDCCCCLXVIII. Contrariis nihil obstantibus. Quod profecto sive in sacrorum Pastorum, sive in populi utilitatem, precamur, cedat.

Datum Romæ, apud Sanctum Petrum, sub anulo Piscatoris, die XXVI mensis Ianuarii, anno MDCCCCLXXXIII, Pontificatus Nostri sexto.

AUGUSTINUS Card. CASAROLI, *a publicis Ecclesiae negotiis*